

Tamatekapua me tona iwi, a Hoturoa me tona iwi, a Toroa me tona iwi, kia u mai te waka i mahue atu ra ki Rangitahua aukahatia ai, ka tahi ano ka tapaia te nukuroa nei.

E ki ana a Percy Smith i roto i tona pukapuka ia "Hawaiki," no te tau 925 nuku atu, hoki iho ranei, te wa i a Kupe (p 216). No te tau 1350 i u mai ai nga waka o te *heke*. I roto i enei tau e 425, kowai te ingoa o te whenua? Kei te kopikopiko tonu hoki te tangata ki Hawaiki ki konei. Whanga rawa te iwi kia u mai te waka nei a "Aotea" katahi ano ka tapaia te ingoa! E tama ma! E tama ma!

Na T. Wi-Repa.

HE KUPU MIHI

Ka hari te hamama kia Ta Apirana Ngata e nga iwi, o Aotearoa me te Waipounamu. Whakarongo kia ia i runga te koa, waiata haere ki nga tikanga e korerotia mai ana e ia Kaua i tau ano. Ehara hoki ia i a tatou i poiti. na Te Tairāwhiti ke. Otira i a ia ka tu hei Minita Maori, ka tika ko tatou ana hipi e hepara ai. Na ka rongorongo nei tatou ki ana kupu tohutohu mo Te Tiriti-o-Waitangi me te tikanga o te ahuhenua, kaua hei whakamaroo ke i o tatou kakii, ka whakarere i a te mea mohio i tohutohu ai, kei pera tatou me o te whakatoinga me o te whakamatautauranga i nga mahi kotiti ke.

Timata mai i te rima o nga ra o Maehe, tae mai ki te mutunga o taua hui nui he whakamiharo taaku mahi i te ao i te po i au ka tae mai ki oku iwi mo aua putake nui, whakaharahara, whakawhaititia ai e Ta Apirana Ngata i runga i tona turanga maori noa nei katahi, i runga i tona turanga mema Paramata ka rua, i tona turanga Minita Maori ka toru. Kia ora a Ngatiporou, me nga iwi o Turanga, otira o Te Tairāwhiti katoa.

He nui te mihi me te tangi kia koutou katoa mo te nui o te manaaki i a Tepuea. Ahakoa koia i tae atu, haruru ana nga tapuwae whakate-wairua ona tupuna me Kingi Te Rata i a ia ka tae ki roto i te riu o Waiau me te Takutairoa o Te Tairāwhiti. I taua wa ano hoki ka u a Taranaki, e rua enei waka i kiia he waka whakakeke i nga ra o mua. Otira i tenei ra kua heke tera korero. Ka tika i konei tenei maioha?—

Whiti ana te ra ki tua o Tawauwau

Ka wehe tenei au hurua!

Ka tika e te iwi te haerenga ki reira. Ko koutou tenei e manaakitia nei i raro i te mana o Kingi Hori Te Tuawhiti, ko Ta Apirana Ngata nei tona mangai i tenei wa mo runga i nga mea e pa ana ki te Ture Tangata me Te Iwi Maori nui tonu. Kia mau e te iwi kia u ki nga korero o aua hui.